

Կինը այստեղ մարդ էր, իր բուն նշանակութեամբ. նրա յարաբերութիւնները տղամարդի հետ ակնյայտ ազատ էին: Նա մնացել էր իր նահապետական պարզութեան մէջ. նա դեռ չէր խարդախտել յարեմական սովորութիւններով, որպէս Պարսկաստանի եւ Հայաստանի այլ կողմերի հայ կանայք, որոնք մահմեդականների ազդեցութեան տակ փոխել էին իրանց ազգային բնաւորութեան իսկական յատկանիշները:

Ակնյայտ ազատ էին աղջիկները, դեռ կոյս, չամուսնացած աղջիկները: Նրանք թէև սովոր չէին խօսել սիրոյ վրայ, թէև չգիտէին սեթեւեթել մանուկ պատանիների հետ, բայց նրանց արգելուած չէր խօսել, զոարճանալ, զբօսանքի գնալ երիտասարդների հետ: Այսպիսի սպարտական սերտ յարաբերութիւնները երկու սեռերի, առաջ էր բերել ամբողջ ժողովրդի մէջ մի տեսակ անմեղութիւն, որ տիրում է մի ընտանիքի մէջ, քոյր եւ եղբօր մէջ:

«Ազատութիւնը, ասում էր Ասլանը, գտնուում է ժողովրդական կենցաղավարութեան երկու ծայրերի մէջ, մեկում, երբ նա դեռ իր նահապետական պարզութեան մէջ է ապրում, միւսում, երբ նա հասել է քաղաքակրթութեան լոյսին: Այս երկու ծայրերի միջոցում տիրում է ստրկութիւնը»: — Այս ժողովուրդը դեռ առաջին ծայրի վրայ է կանգնած:

Ճերուկի տանուտէրը, տեսնելով, որ ես շատ շտապում եմ, հրամայեց իր ձիերից պատրաստել երկուսը, մեկը տոեց իր միջնակ որդուն եւ հրամայեց ինձ տանել եւ հասցնել Ս. — բէկի վրաններին, միւսը ինձ տալով, ասաց.

— Քո ձին գողացուել է, ինձ համար նախատինք կը լինէր, որ մի «լաւ բարեկամիս» որդեգիրն իմ վրանում հիւր լինելուց յետոյ, այստեղից հեռանար առանց ձիու. դրա համար այս նժոյգը կը տանես որպէս իմ կողմից ընծայ:

Ես հրաժարուեցայ ընդունելուց, եւ միեւնոյն ժամանակ դժոարացայ Մըհեի հնարած սուտը պարզել, որ իմ ձին ամենեւին գողացուած չէր:

Ճերուկին դարձեալ պնդեց, թէ ես հիւրասիրութեան դեմ վարուած կը լինեմ, եթէ չընդունեմ նրա պարզելը: Ես պատասխանեցի:

— Դուք այս ձին ինձ նրա համար էք ընծայում, որ ես կորցրել եմ իմը, ես կընդունեմ, միայն այն պայմանով, եթէ կը գտնեմ իմ ձին, այն ժամանակ ձերը ետ կը դարձնեմ:

Ճերուկին ասաց. միայն դա չէ պատճառը, այլ նա ցանկանում է, որ «իր բարեկամի» որդեգիրն մի թէթեւ բանով պատուած լինի: Բայց ո՞վ էր նրա բարեկամը, որի որդեգիրը լինէի ես:

— Ճերուկի որսորդը, — ասաց նա: